

Les soucoupes

i n'viennent point d'Mars

— Bonjour Mossieu Constant, Je n'vous déring' point ?

— Mais non, mais non Zeph ! mais qu'min qu'cha s'fait qu'vous v'nez m'vir ? Flavie all' n'est point malade ?

— N'y a point d'dinger, all' a

par Constant COPIN.

eun' carcasse ed corbeau. Non, alle est partie queur' de l'prise. Ch'est eun' vraie ruine cheull' femm' là, vous pouvez m'croir' Mossieu Constant.

— Bah ! vous Zeph vous fumez bin.

— Bin sûr, mais cha n'coût' point si quer. Savez-vous Mossieu Constant qu'all' prind cha avec eun' culère à café ! ch'est compréhinsipe, avec un nez comme alle a, mais des fos à s'met in colère parc' que j'y dis : « T'es core in train d'mette eun' palée à tin fu ? »

— Cha, vous comperdez bin Zeph, que si vous y dit's des affaires ainsin, qu'cha li rappell' qu'alle a un gros nez et a n'peut point êt' continte ! Mais dit's me un peu l'motif ed vo visite.

— Eh bin, v'là, vous connaissez Zidor, ch'l'astrologue ? ej' sais qu'ch'est un minteux, mais li vient d'm'apprinte eun' bonn', figurez-vous qu'avec es lunett' d'approche qu'in dirot un tulau d'poël', li r'weitt' toudi dins l'ciel, eh bin ! ch'l'ostrogot-là, li m'a affirmé qu'les soucoup's i n'vénot'nt point de l'planèt' Mars !

— Ah ! et d'duch' qui vien-n'nt alors ?

— Bin, d'après li, cha vindrot ed jus d'penn' terre.

— Hein ? d'jus d'penn' terre ? Je n'vous comprinds point Zeph !

— Pourtant ch'est bin ainsin qui m'l'a espliqué. In fin a s'n'idée qu'les soucoup's i viendrot'nt d'eun' aut' planète.

— Ah ! bon j'y sus ! ch'est d'Jupiter.

— Ouais, ouais, m'sieu Constant, ch'est cha. Et pis, savez-vous ch'qui m'a ocor raconté ? que chès gins d'par là qui z'éto'ent tout mal foutus, qui n'avo'nt qu'eune œul au mitan d'leu front, des longu's gambes, des tiots bras et eune orell' ed su leu vinte ! allons m'sieu Constant, cha peut-i êt' vrai cha ?

— Acoutez Zeph ! mi jé n'sus point ostrogot Heu ! astrologue. Eusse i votent des séquois qu' nous n'vélon's point et ch'qui dit, cha pourrot bin êt' vrai.

— Eh bin alors ! heureux'mint qu'Flavie alle est Doualsienne.

— Pourquoi cha, Zeph ?

— Vous m'demandez pourquoi ? eun' femme aussi curieuss' qu'alle acoute à chès portes ! vous n'velez point qu'all' plach' d'êt' Doualsienne, all' s'rot Jupitérienne, et qu'all' arot s'n'orell' ed' sus sin vinte ? Vé, j'vous certifie m'sieu Constant qu'all' s'rot foutu dé l'ver ses cotrons pou acouter !